

臨沂縣誌
(民國)
一

ISBN 988-978-316-9



二〇〇六年三月

中國海疆舊方志

選題組織策劃：蝠池書院出版有限公司

發行者：蝠池書院出版有限公司

出版者：蝠池書院出版有限公司


香港九龍旺角花園街二十六號好景商業中心二十三樓二三〇九室

電話：〇〇八五二一六五五九二三七〇

傳真：〇〇八五二一三三八七九〇〇

定價：人民幣 九五〇〇〇元（全書共三百一冊）

臨沂縣志



序

宇宙萬象因時間之進行倏忽卽過去過去之時愈多則人類之記憶愈難志書者一邑之歷史載一邑之文獻俾垂不朽以爲後來之鑑者也余攝篆臨沂竊意此地壤錯齊魯居近聖人代有名流地多遺跡志書紀錄必燦然大備下車後延見耆老首先訪問乃知邑志自清康熙甲辰未改縣時州牧邵公修訂以來迄今逾二百年乾隆二十五年曾修府志而蘭山縣志未有成書清季黔南陳公蒞任茲邑籌議編纂邑人士頗踴躍采訪已集陳公卸任去因循至今未能賡續余聞之蹙然

夫自康乾以來時代之變易人材之繼起郡縣之沿革事務之複雜紛紜變幻更僕難終不爲編紀以示來茲代遠年湮往事將歸銷滅不惟守土者之咎抑亦都人士之恥也况值共和肇建政體更新臨沂縣名規復古制非有纂述何以應文明之運爲一邑光榮乃召集紳耆開局編撰繼續前美闡揚後徽甫就緒奉檄攝篆泰安余竊憂前功之難竟也幸局紳急公好義期於有成又閱六月纂修事竣以書來問序於余竊思設縣以後宰是邑者夥矣有志於此者想不獨陳公顧不能有成者蓋案牘之勞形人事之錯迕往往掣其肘而敗乃事

也余之去沂志書甫創始耳今乃底於成非總纂王君
受夫以及在局紳耆之各盡乃職能善其後曷克至此
有志者竟成眾擎者易舉能體此意施於有政而庶績
熙矣豈獨志書爲然哉因郵寄數行以弁簡端

中華民國五年八月前知臨沂縣事南州沈兆禪序

序

中華民國五年冬余捧檄臨沂竊維志乘者爲治之譜也甫下車卽徵求其書吏以舊志進讀之知爲清康熙時州牧邵君所輯沂州志年代邈遠時勢遷移不足以資考鏡良用爲憾訪諸邑父老乃知自改縣蘭山未嘗修志逮縣名再易而紀載仍缺前令陳君笑山修而未成沈君幼沂賡續提倡設局編纂已歷十有四月今付剞劂將成書矣則大喜自幸余之治沂不至如夜行而無燭也未久司事者以工竣告而問序於余余讀之皇然曰甚哉治沂之難也今縣境在漢不止七縣後逐漸

合併至清乃定今境在古地小易治今則幅員遼濶毗連鄰嶧犬牙錯入最易藪奸此觀於疆域鄉社而知其難也男女丁口超過六十六萬生齒可謂繁衍而實業未興學校未遍謀生何計陶淑何方此觀於戶口物產教育而知其難也馬陵東峙沂沭分流盛漲時來汪洋浩瀚疏濬無策蕩析堪虞救恤弗遑况云徵斂此觀於山川而知其難也西南一隅風氣强悍草竊乘間每煩大兵絕其根株孰操勝算此觀於兵防而知其難也漢晉以來人材蔚起近古俊彥不逮前朝激勸栽培當操何術此觀於人物而知其難也自昔循良爲吾師表遠

稽史傳近載口碑躡影追風安能自信此觀於宦績而
知其難也緣此諸難余滋懼矣然天下事患不知其難
耳知而勉焉庶寬罪戾則此書之成謂邑父老賜我韋
弦可謂邑父老爲此後治沂者貽以規矩亦無不可爰
抒此意冠諸簡首

中華民國六年一月知臨沂縣事奉天楊孝則序

序

序

縣之有志猶國之有史家之有乘固盡人而知之然不遇其人不逢其時舊聞往事或如杞宋無徵此亦嗜古者之隱憾也臨沂爲歷代州郡治所實東省一大都會在科舉時代固余舊遊地也其山則祖脈蒙頂蜿蜒自西北而來水則沂流如虹蟠繞城下此間靈秀鍾毓代有偉人若五賢祠右軍祠祠外曬書臺洗硯池集柳碑皆名賢遺迹旣時常目覩流連矣若城外諸葛里琅邪冢二疏城王元公臥冰守柰處勝地蓋難屈指數雖未必均經過訪然日與此邦士君子遊得於耳食亦不少

序

惜見聞多異辭未能一一筆記之耳民國三年秋余以司鐸中校得與費邑王君受夫邂逅受夫先世本沂人且習沂事踰歲適臨沂縣長沈君幼沂倡率邑紳編纂志書不以余不才與受夫及臨沂諸賢同仁分纂已而受夫獨任總纂事因得上下議論藉匡不逮誠幸事也至民國六年一月書成同人囑爲之序夫臨沂爲漢唐舊縣歷代以來制度頻更名稱亦屢易世不知幾治亂局不知幾分合山陵岸谷不知幾更易城郭人民不知幾變遷遙遙數千載而臨沂舊名復見於今又值此文明進化一日千里賢宰官爲之董率俾二百餘年失修之

邑志得賡續以有成譎陋如余竟亦得廁名其間豈不
幸歟乃書以弁諸簡端

中華民國六年一月吉日城陽潘琛遠序

序

